




# cuncursu musicali

Sa scola civica de mùsica fait sciri ca at apariciau unu cuncursu musicali po is allievus cosa sua chi ant sighiu is letzionis de s'annualidadi 2011-2012 de totu sa provìntzia de Aristanis. Po s'isciri no si pagat nudda e is prèmius at a essiri cussus de donai sa possibilitadi de pigai parti sena pagai a is letzionis de s'annualidadi 2012-2013 o de otenni unu iscontu po s'iscritzioni. Podint partetzipai a su cuncursu musicali totus is allievus nàscius apustis su 31 de su mesi de Idas de su 1997. Sa domanda po partetzipai depit essi fata a sa segreteria de sa scola civica de mùsica portendidda a manu o mandendidda via mail.

**S'iscadèntzia est fissada po cenàbura 13 de abrili 2012** (13.04.2012) e si podint domandai informatzionis e novas a sa



segreteria etotu, tzerriendi a su nùmunu de telèfunu 0783 859391 o castiendi su regulamentu chi s'agatat in su giassu web de su Comune de Baressa

[www.comune.baressa.or.it](http://www.comune.baressa.or.it)

## Novas Baressesas inderetura in domu!!

Novas Baressesas at a bessiri prus o mancu una borta a su mesi e s'at podi arriciri inderetura in domu, cun una e-mail: bastat a ddu pediri mandendi una punta de billetu eletrònicu a s'indiritzu [serviziocultura@comune.baressa.or.it](mailto:serviziocultura@comune.baressa.or.it) iscriendi su nòmmini, su sangunau e "bolu arriciri Novas baressesas".

In prus, s'at podi ligi puru in su giassu internet de su comunu [www.comune.baressa.or.it](http://www.comune.baressa.or.it) in sa **setzioni de sa lingua sarda** o agatai in medas atividades comercialis de sa bidda o in sa biblioteca comunali



**Sa redatzioni de Novas Baressesas est contivigiada de su Servìtziu linguisticu sardu e de s'Assesorau a sa Cultura de su Comune de Baressa.**

*S'isportellu linguisticu est a disponimentu de tzitadinus, maistus de iscola, professoris e istudentis po cali si siat informatzioni, fundamentu, duda, crosidadì, bibliografia, sitografia asuba de sa lingua sarda, po consulèntzias didàticas e po contzillus chi pertocant is arrègulas de iscrittura de su sardu.*

### Su Servìtziu in abrili at a essi abertu:

	de	a
Mèrcuris 04 -11- 18	10.40	15.10
Giòbia 19	17.50	19.20*
Martis 24	11.10	14.40

\*atividadis cun in pipius in sa biblioteca de Baressa



**Comunu de Baressa**  
Provìntzia de Aristanis



☎ 0783-930049 Fax 0783-930118  
e-mail: [info@comune.baressa.or.it](mailto:info@comune.baressa.or.it)

Follietu periòdicu de informatzioni istituzionali de su Comune de Baressa

**Responsabilitadi e proprietadi de su Comune de Baressa (or)**

**Annu II, n. 3**

Acabbau su 4 de abrili de su 2012

**Chi ses europeu, chistiona in sardu**



# Pasca manna in Baressa

Custus ant a essiri is atòbius de sa Cida Santa in Baressa:

**Giòbia Santa (5 de Abrili):** a is dexi de mengianu in sa catedrali de Abas Monsennior Dettori at a fai sa missa po benedixi s'ollu Santu.

A is ses de merì (ore 18.00) in sa crèsia de Santu Girorgi in Baressa c'at a essi sa missa de s'Urtima Cena de su Senniori.

**Cenàbura Santa (6 de Abrili):** facioras de is ses e mesu de merì (ore 18.30) s'at fai sa passioni de Gesus. De is seti e mesu de merì (dalle 19.30) c'at

a essi "Su Scravamentu" cun sa prèdica fata de s'arretori Alfio Pusceddu.



**Sàbudu Santu (7 de Abrili):** facioras de is dexi de noti (ore 22.00) in crèsia s'at a fai sa vèllia nodida de Pasca Manna.

**Domìnicu de Pasca Manna (8 de Aprili):** facioras de is dexi e mesu (ore 10.30) processioni po s'Incontru de sa Mamma de Deus cun Gesus torrau a biu

e a is ùndixi (ore 11.00 ) missa de su Senniori Arresuscitau. ì

**Mèrcuris 11 de Abrili** a is cincu de merì (ore 17.00) c'at a essi sa missa in sa Domu de is Bècius de Baressa. Impari a is bècius de s'ospìtziu c'ant a essi is piciocheddus chi sighint sa dotrina puru.



*S'Amministratzioni de Baressa,  
impari a s'Ufitziu lingua  
sarda e a is dependentis de  
su Comunu, augurat  
a totus is baressesus*

*una Pasca Manna bella e praxili.*

*Su Sindigu*

*Piergiorgio Corona*

## Pràngiu de su Lunis de Pasca Manna

**LOCALIDADI ' COSTA LINUS -FATORIA JARA  
GONNOSNO'- facioras de sa una -(ore 13.00)-  
su 9 DE ABRILI 2012**

Sa fatoria Jara e sa cooperativa "Il Seme", impari a is Comunas de Assolo, Sini, Gonnostamatza e Baressa ant apariciu po su Lunis de Pasca Manna unu pràngiu ispeciali meda. Coxineris po una dii ant a essi is picocus portadoris de handicap chi funt sighendi is atividades de sa cooperativa *Il Seme*

in sa fatoria Jara. Imparis a is operadoris ant a aprontai unu pràngiu bellu meda po totus cussus chi ant a prenotai.

Apustis de unus cantu antipastus, s'at a papai pasta fata a forru e marraconis cun sparau, porceddu arrostitiu e fintzas colomba, cafei e durcis. Sa cosa de bufai est giai aintru de su prètziu de su menù.



Apustis de su pràngiu s'ant a fai ballus e cantus po s'ispassiai totus impari. Po pigai parti a custa iniziativa de socialitzazioni, educatzioni e de ispàssiu tocat a si prenotai e a ponni sa cuota in comunu o in sa fatoria. Po calisiat duda o pregunta tocat a tzerriai a su 0783931678 - 349 7546159.

## Pindulas de lingua sarda

Su sardu tenit una precisioni manna meda po inditai is festas prus nodidas de sa cristianidadi. Difati chi su Nascimentu (Natale) benit inditau comentu dii de Paschixedda, su ses de gennàrgiu est sa Pasca de is Tres Gurreis (i Re magi) e invècias su tempus chi in italianu est su *Carnevale* beniat inditau comentu *carrasecare*, o, in atrus fueddus chi benit de su Latinu, *carne secare/segare*, e, duncas, boliat nai ca, apustis de Carrasecare, tocat a ndi liai sa petza de su papai poita inghitzat sa caresima de penitèntzia. Sa Caresima acabat cun sa festa prus manna de sa cristianidadi, **Pasca Manna**, *la Pasqua*, chi est sa festa de Gesus torrau a biu apustis de ai salvau s'umanidadi.